

13. marts 2006

UKIU 2006/12

**Eqquiniaasitsinermi akileraarutit pillugit Inatsisartut inatsisaata  
allanngortinneqarneranik Inatsisartut inatsisissaattut siunnersuut**  
(Akileraarutinik akiliinissamut akisussaasuunermik erseqqissaaneq kiisalu  
siulersuisuni ilaasortat akiliussisussamaataasarnissaannik atuutilersitsinissaq)

pillugu

**Inatsisartut Akileraartarnermut Akitsuusiisarnermullu Ataatsimiititaliaata**

**ISUMALIUTISSISSLUTAA**

**Siunnersuutip aappassaaneerneqarnerani saqqummiunneqartoq**

Inatsisartut Akileraartarnermut Akitsuusiisarnermullu Ataatsimiititaliaat  
suliarinninnermini ukuninnga inuttaqarpoq:

Inatsisartunut ilaasortaq Augusta Salling, Atassut, siulittaasoq  
Inatsisartunut ilaasortaq Agnethe Davidsen, Siumut, siulittaasup tullia  
Inatsisartunut ilaasortaq Agathe Fontain, Inuit Ataqatigiit  
Inatsisartunut ilaasortaq Lars Emil Johansen, Siumut  
Inatsisartunut ilaasortaq Lene Knüppel, Demokraatit  
Inatsisartunut ilaasortaq Jens Lars Fleischer, Siumut - Sinniisussaq

Akileraartarnermut Akitsuusiisarnermullu Ataatsimiititaliap UKIU 2006-imi  
siullermeinerup kingorna inatsisissatut siunnersut matumani pineqartoq  
nassuaatitaalu misissorpai.

Siunnersuut UKA 05-imi (UKA 05/51) taamani Naalakkersuisuusunit  
saqqummiunneqaqqaarpoq. Inatsisartunut 15. november 2005-imi qinersinissap  
nalunaarutigineqarneratigut siunnersuut atorunnaarpoq. Siunnersuutip  
annertunerusumik allannguuteqartinnagu saqqummiuteqqinnejarnissa  
Naalakkersuisunngortut toqqarsimavaat.

## **Siunnersuutip imarisai**

2004-mut nalunaarummini (49-1) eqquiniaasitsinermut akileraarutit pillugit maleruagassat atuuttut nutarterneqarnissaat Inatsisartut Ombudsmandiata kaammattuutigaa. Inatsit malillugu akileraarutinik kikkut akiliisussaatitaanerat inatsisikkut erseqqissarneqassasoq Ombudsmandip immikkut kissaatigisimavaa.

Peqatigiiffiit il.il. eqquiniaasitsisut eqquiniaasitsinermi akileraarutit akilerneqarnissaannut akisussaanerat siunnersuutikkut matumuuna naqissuserneqassasoq Naalakkersuisut kissaatigaat.

Peqatigiiffiit il.il. eqquiniaasitsisut siulersuisuini ilaasortat eqquiniaasitsinermi akileraarutinik akiliingitoortoqarnerani tulliullutik akiliisussanngortinnejartarnissaat siunnersuutigineqarpoq. Peqatigiiffiit il.il. eqquiniaasitsisut akileraarutinik piffissaq eqqorlugu akiliingitsoorneranni taamatut akiliisussanngorneq atuutilertassaaq. Nalinginnaasumilli akiliisitsiniartarnermi periusaasup aallaavigaa peqatigiiffiup eqquiniaasitsisimasup akileraarutinit akilinngitsuugaanut akileeqqusissumvik allakkamik tigusaqartoqarsimatinnagu akileraarutit akilinngitsuukkat akiliisitsiniartartumit akilersinniarneqarsinnaanngitsut.

## **Tusarniaanermiit akissutisiat**

Siunnersuut 5. april 2005-imi 6. maj 2005-imi tusarniaanermut akissuteqarnissamik piffissalerlugu taamani Naalakkersuisuusunit tusarniaassutigalugu nassiunneqarpoq. Siunnersuut taasariaqartunik allanguuteqanngimmat tusarniaaqqinnissaq Naalakkersuisunngortut pisariaqartutut isigisimanngilaat.

Tusarniaanermiit akissutisiat nuutinneri siunnersuutip ataatsimiititaliamit suliarineqarnerani atugassatut ataatsimiititaliap pissarsiarai. Tusarniaanermiit akissutisiat oqaaseqarnissamik pisariaqalersitsinngillat.

## **Siunnersuutip aningaasatigut kinguneqaatissai**

Siunnersuutip siunertaa pingarneq tassaammat maleruagassanik atuuttunik erseqqissaanissaq siunnersuutip aningaasatigut immikkut kinguneqaateqarnissaa Naalakkersuisut naatsorsuutiginngilaat.

## **Akisussaasuuneq**

Siulersuisunut ilaasortat akisussaasuunerannut tunngaviusutut apeqput Akitsuusiisarnermut Ataatsimiititaliap ataatsimiititaliatut sulinermini immikkut maluginiarsimavaa. Ulloq 24. februar 2006 tamanna pillugu allakkaminni Naalakkersuisut imaattunik ilisimatitsissuteqarput:

"... siunnersuutip nr. 2-anı ima allassimasoq takuneqarsinnaavoq "Akisussaasuuneq atuutilissaaq piffissaq peqatigiiffiup il.il. eqquiniaasitsisup eqquiniaasitsinermi akileraarutinik piffissaagallartillugu akiliiffissaa qaangiunniariarpas.". "

*Siunnersummut oqaaseqaatini ilaatigut oqaatigineqarpoq "Taamaammat siulersuisunut ilaasortat sinniisuullutik akiliussisussamaataanerat aatsaat atuutilersussaavoq, eqquiniaasitsisup akiliisitsiniartartutut oqartussaasut akileraarutinik nalunaarutiginneqqulluni akileeeqqullunilu qinnuiginninnerat arlaleriarluni sumiginnarsimappagu."*

*Tamanna tunngavigalugu Demokratit aperippuit, arlaleriarluni-mik oqarneq qanoq paasisariaqarpa? Aamma qaangiunniariarpas qanorpiaq isumaqarami?*

*Tassunga tunngatillugu oqaatigisinnaavara inatsisip oqaasertaani allassimasoq qaangiunniariarpas isumaqarmat siulersuisuni ilaasortat akileraarutip akilerneqarnissaanut akisussaasuulissasut, peqatigiiffiup il.il. eqquiniaasitsisup piffissaq akileraarutinik piffissaagallartillugu akiliiffissani kingusinnerpaaq qimmuppagu. Tassunga tunngatillugu innersuussutigineqarpoq inatsisisatut siunnersummi aalajangersakkanut ataasiakkaanut oqaaseqaatini nr. 2-mi immikkoortoq 1.*

*Oqaaseq arlaleriarluni inatsisisatut siunnersummi aalajangersakkanut ataasiakkaanut oqaaseqaatini nr. 2-mi immikkoortoq 2-mi atorneqarpoq. Immikkoortumi tassani eqqartorneqarput akiliisitsiniartarnermik periutsit nalinginnaasut, tassa imaappoq eqquiniaasitsinermi akileraarutit akiligassanngorsimasut qanoq innikkut siulersuisunut ilaasortanut ataasiakkaanut akilersinniarneqartarnerannik periuseq.*

*Taamaalilluni imaalerpoq akisussaasuuneq piffissaagallartillugu akiliiffissaq kingulleq qimmunneqarniariarpas atuutilissasoq, akiligassalli nalinginnaasumik periuseq malillugu aatsaat siulersuisunut ilaasortanut akilersinniarneqassapput peqatigiiffimmut il.il. akileraarutinik akiliisussaatitaasumut akilersinniarluarlugit iluatsitsisoqanngippat.*

*Imaanngilarli akiligassat siulersuisunut ilaasortanut pisut ilaanni siusinnerusukkut akilersinniarneqartarsinnaanngitsut. Taamaaliortoqarsinnaavoq assersuutigalugu peqatigiiffifik il.il. pineqartoq pisortanut annertuunik akiligassaqarpat, imaluunniit akiligassallip annertuunik annasaqarfingineqarnissaa ilimanarsorinarpas..."*

Naalakkersuisut akissuteqaataat Akileraartarnermut Akitsuusiisarnermullu Ataatsimiititaliap tusaatissatut tiguaas.

### **Akileraartarnermut Akitsuusiisarnermullu Ataatsimiititaliap inassuteqaataa**

Akiitsunut akilerneqanngitsunut 2004-ip naanerani Akileraartarnermut Pisortaqarfip takussutissiaa naapertorlugu eqquiniaasitsinermut akileraarutit akilerneqanngitsut 2 mio. kr. sinnerlugit angissuseqartut Akileraartarnermut

Akitsuusiisarnermullu Ataatsimiititaliap takusinnaavaa. Aningaasat taakku pissusissamisuunngitsumik amerlavallaartut ataatsimiititaliaq isumaqarpoq. Tamanna tunngavigalugu ataatsimiititaliap Naalakkersuisunut **inassutigissavaa** akiitsut akilinngitsuukkaat amerliartuinnarnissaat pinaveersimatinniarlugu tamassuma pisortanit nakkutiliivigineqarnera sakkortusineqassasoq sakkortunerusumillu tunngavilimmik periuseqarfigineqassasoq. Taamatut sammivilimmik iliuuseqarnissamut siunnersuut matumani pineqartoq atorneqarluarsinnaasoq ataatsimiititaliaq isumaqarpoq. Taamaammat inatsiseqarnerup allannguteqarnerata sakkortusineqarneratalu ilisimaneqarnera siammarsarumallugu immikkut iliuuseqarnermik takutitsissasut ataatsimiititaliap ilanngullugu Naalakkersuisunut kaammattutigissavaa.

**Akileraartarnermut Akitsuusiisarnermullu Ataatsimiititaliap isumaqatigiittup siunnersuutip akuersisutigineqarnissaa inassutigaa.**

Taama oqaaseqarluni Inatsisartut Akileraartarnermut Akitsuusiisarnermullu Ataatsimiititaliaata siunnersuut aappassaaniigassanngortippaa.

Augusta Salling,  
Siulittaasoq

Agnetha Davidsen

Agathe Fontain

Lars-Emil Johansen

Lene Knüppel